

潛研堂金石文跋尾

潛研堂金石文跋尾續卷第四

嘉定錢大昕

宋

龍興寺鑄金銅像菩薩并蓋大悲閣序

右龍興寺鑄金銅像菩薩并蓋大悲閣序僧惠演所撰云開寶四年七月下手脩鑄而不詳畢工之年月據其文稱太祖皇帝廟号則當在太宗改元太平興國以後矣而末題乾德元年歲次五月八日記攷乾德紀元在開寶之前書歲次而不書干支亦無此例碑當時所立不應如此紙繆當是翻刻時年号剝落而以意妄改耳

郭忠恕三體書陰符經

乾德四年四月

右郭忠恕三體書陰符經三體者古文篆隸也大書篆體而古文與隸旁注於下雖兼三體實以篆爲主忠恕書法方駕陽冰

實在同時二徐之上夢英已下遠不逮矣族子獻之云此經刻于唐實際寺懷惲禪師碑之背面

夢英書夫子廟堂記

右夢英書夫子廟堂記自跋云此記刊石元在湖州臨安縣案湖州有歸安縣無臨安縣臨安乃杭州屬縣自唐至今未聞改隸英公何不攷乃不其末題壬午歲六月廿五日益太平興國七年也碑末列銜者四人承奉郎守太子右贊善大夫陝府西南路諸州水陸計度同轉運賜緋魚袋祖吉通直郎行左補闕陝府西南路諸州水陸計度轉運副使賜緋魚袋趙載兩人爲一列朝散大夫行殿中侍御史通判永興軍府事師顏朝散大夫行尙書考功員外郎權知永興軍府事柱國李準兩人爲一列轉運爲監司官故列於郡官之上其序則以後爲尊也宋史

職官志轉運司有使副使判官而不載同轉運之名今攷李氏  
長編太平興國七年有西川同轉運范祥東川同轉運卜倫荆  
湖同轉運孫日新此碑亦有同轉運祖吉則是宋初曾置是官  
不知省於何年志所載特熙寧以後之制耳師顏宋史有傳刊  
本或譌作頑當據碑正之傳云太平興國初遷監察御史通判  
永興軍坐秦王廷美假公帑緡錢左授乾州閫練副使尋復舊  
官六年改殿中侍御史通判邠州據此碑則以殿中侍御史通  
判永興軍乃在七年恐史有誤也

鐵佛寺塔柱文

淳化元年

右鐵佛寺塔柱文上鐫上生皈依發願文及往生內院真言  
州管內觀察判官李思明發心鐫寫下鐫千臂千眼觀世音菩  
薩陀羅尼大身真言末題進士輩護書開福禪寺傳法沙門道

崧鐫經宋淳化元年庚寅歲李昇鐫字在長沙府鐵佛寺金石家未有著錄者今春錢唐梁侍講山舟以家藏本見貽蓋其弟冲泉侍郎爲湖南按察使日遘有修塔之役拂拭得之并賦詩紀其事五金唯鐵易壞鐫刻湮入匪易古鐵文之存於今者唯南漢二塔及此柱皆陰識淡刻點畫有法非近代鐫工所及若楊吳之大安寺香爐則陽文隱起字亦敝斜難以模楷後世矣

元聖文宣王贊并加號詔

大中祥符

右元聖文宣王贊并加號詔碑分上下層上刻御製贊下刻詔書末三行云大中祥符元年十月十四日東封禮畢十一月一日車駕幸曲阜縣謁奠先聖文宣王命刑部尙書溫仲舒等分奠七十二弟子先儒禮畢幸孔林是日詔先聖加號元聖文宣王御製贊又詔吏部尙書張齊賢等次日以太牢致祭詔充公

顏子進封兗國公十哲閔子已下進封公會子已下進封侯先  
儒左丘明已下進封伯五年八月二十二日奉勅諸道州府軍  
監各於元聖文宣王廟刻御製贊并詔十一月日奉勅改謚曰  
至聖文宣王碑未見建立年月蓋在大中祥符六年以後也碑  
在南雄府學明倫堂前當時各路州府依勅刊勒宜處處有之  
今皆不存而五嶺以南畱此片石以備文廟掌故居然魯靈光  
矣翁氏粵東金石略未收此刻予爲表而出之

王濟題名 天聖元年九月

右王濟題名正書自左而右在虎邱劍池石壁文云大宋天聖  
元年癸亥九月十日太常丞同判福州王濟與泉州同安尉  
林太易男緯侍行書于石紀年祀其云同判者通判也天聖初  
章獻太后臨朝避其父諱凡官名地名通字皆易之如通州爲

崇州通利軍爲安利通判爲同判是也后崩後卽復其舊王廣應天府人參知政事堯臣之父見宋史隱逸傳天聖九年爲審刑院詳議官殿中丞坐弟冲事實監蔡州稅見續通鑑長編

王質等題名

右王質等題名八行在虎邱石壁其文云太原王質子野武都章旣進之姪岷伯鎮口陵馬宗誨口口天水趙士龍雲卿楚才大師長口己巳九月廿日同議己巳者仁宗天聖七年其時質以集賢校理同判蘇州岷則節度推官也吳郡圖經續記云平江節度推官驛舍昔甚隘陋天聖中章岷伯鎮居幕府始廣而新之伯鎮之弟伯瞻及今太守朝議公同侍親居此記所云太守者名岵字伯望伯瞻官至太常少卿按清廣東其名則不可攷矣岷名位亦顯治平元年八月以刑部郎中奉使契丹見宋

史英宗紀治平二年八月以光祿卿直祿閣知越州四年五月移福州見嘉泰會稽志

朱異等題名 天聖八年八月

右朱異等題名行書自左而右凡七行文云給事中新知揚州朱異集賢校理同判蘇州王質集賢校理同判杭州錢仙芝大理寺丞知長洲縣事卻飾廣州支使知吳縣事馮允成節度推官試校書郎章岷天聖八年八月十二日同遊朱異者天長人子壽昌見宋史孝義傳姑蘇志稱明道元年二月以給事中集賢院學士知揚州改任蘇州八月以工部侍郎致仕據此刻則異於未任揚州之前已到蘇州但未知其居何職耳

葉清臣題名

右葉清臣題名在華陰縣嶽廟文云翰林侍讀學士尚書戶部



郎中知永興軍府事本路安撫使兵馬都部署吳興郡侯葉清  
臣慶歷丁亥秋赴官便道恭款神祠明年四月蒙恩召還再經  
宇下時通判永興軍府劉紀駐泊都監王仲平管勾機宜韓鈺  
知涇陽縣施邁同州觀察推官李孚佑從行丁亥者慶歷七年  
也攷清臣傳云入翰林爲學士丁父憂服除卽除翰林侍讀學  
士知邠州道由京師因請對改澶州進尙書戶部郎中知青州  
徙知永興軍會河決商湖北道艱食復以爲翰林學士權三司  
使此題乃由永興軍內召尙未授職時宋初遣大將出征則稱  
兵馬都部署仁宗朝置諸路安撫使兼本路馬步軍都部署以  
守臣領之故安撫有帥臣之稱其後避英宗嫌名改部署曰總  
管而職任如舊其云駐泊都監則武臣管軍者隸於都部署司  
所謂路分都監也安撫例兼都部署故史家略而不書南渡以

後列傳間有書乘馬步軍都總管者則史臣失於檢勘故也列傳又有但書知某州而不言兼安撫者此史之省文非委任有輕重之殊元明以後士大夫讀史能知其義例者罕矣

旌賢崇梵院牒 皇祐二年九月

右旌賢崇梵院牒首一行云中書門下牒旌賢崇梵院牒尾列銜三人曰工部侍郎參知政事高曰兵部侍郎平章事宋曰吏部侍郎平章事文蓋文彥博宋庠高若訥也中載右諫議大夫天章閣待制勾當三班院王子融奏臣亡兄曾於鄭州新鄭縣安葬墳側修到僧院已奉勅賜号崇梵院欲乞依呂夷簡等墳所僧院例每年撥放剋度行者并臣亡兄神道碑昨蒙御筆賜名旌賢其崇梵院欲乞賜号旌賢崇梵院候勅旨奉勅宜特賜旌賢崇梵院爲額每年乾元節與剋度行者並名按春明退朝

錄皇祐中王侍郎子融守河中還以唐明皇所題裴耀卿碑額  
上之仁宗遂御篆賜沂公碑曰旌賢其後踵之者呂許公懷忠  
李燕長編亦云王曾家請御篆墓碑帝因惻然思夷簡嘗懷忠  
之碑四字以賜之蓋御篆碑額本是夷簡依曾例而脩院歲剝  
度行者一人則又曾家援夷簡爲例也子融本名嶠資元中嘗  
奉勅撰唐餘錄六十卷其時尚未更名厥後以與元昊同音請  
改以字行

韓愷墓誌

嘉祐七年十一月

右韓愷墓誌愷字和仲殿中丞公彥之次子年二十而卒忠獻  
公琦銘其墓前列銜云叔祖開府儀同三司行刑部尙書同中  
書門下平章事昭文館大學士監修國史上柱國儀國公攷宋  
史率簡表嘉祐三年六月韓琦自樞密使工部尙書依前官同

平章事六年閏八月自工部尙書同平章事加昭文館大學士  
監修國史其轉刑部尙書封儀國公則表闕之續通鑑長編嘉  
祐七年九月以明堂赦書加恩宰相韓琦封儀國公八年四月  
加門下侍郎兼兵部尙書進封衛國公此皆可補表之闕而自  
工部轉刑部究未詳何年月也

石林亭詩

嘉祐七年十二月

右石林亭詩翰林侍讀學士尙書禮部郎中永興軍路安撫使  
兼知軍府事劉敞作次其韻者將仕郎守大理評事簽書鳳翔  
府節度判官廳公事蘇軾也額題京兆唱和四篆字嘉祐七年  
十二月十五日將仕郎守縣尉兼主簿事李邵書登仕郎試祕  
書省校書郎守鳳翔府麟遊縣令郭九齡建按簽署改爲簽書  
本是避英宗嫌名嘉祐七年之冬英宗尙未卽位無緣先爲改

易殆刻於次年三月以後也宋時文臣出莅節鎮例書知某州某府不書軍額獨京兆稱知永興軍不云知京兆府大名或稱知天雄軍

山陰縣新建廣陵斗門記

嘉祐八年

右山陰縣新建廣陵斗門記將仕郎守許州許田縣尉張燾撰并書將仕郎守越州山陰縣尉李公度篆額碑末列文林郎守主簿王冲朝奉郎守太子右贊善大夫知縣事兼提舉鑑湖武騎尉吳安朝奉郎尚書屯田員外郎通判越州軍州兼管內堤堰橋道勸農同提點銀場公事騎都尉賜緋魚袋張誥立石宋史列傳有兩張燾其一字子公仕南渡孝宗朝相距年代已遠其一字景元仕英宗神宗朝當卽其人傳不言爲許田尉者略也蓋楷書極似唐人其書患作也庸作庸擬作壩則它碑所未

見公度篆亦有法廣陵斗門乃後漢會稽太守馬臻所立三大斗門之一曾子固序越州鑑湖圖亦載此名與漢之廣陵國初不相涉秀水朱氏因元時江浙行省鄉試賦有以錢唐江當枚乘七發之曲江者遂援此以證廣陵去錢唐不遠然枚乘生于文景之世不可以後證前

二體石經周禮殘字

嘉祐

右二體石經周禮殘字凡六列每行十字一行篆書一行正書  
大宗伯八十八字小宗伯六十字肆師一百五十字司尊彝六十六字司几筵八十字典瑞廿三字典命一百廿字典祀十八字守祧五十三字世婦七十字職喪九字大司樂一百字弁標題十四字共八百五十一字其中文字曼滅者篆百有六真百廿五餘皆完好可讀以今本校之無一字不合篆文並爲隸佐

爲左續爲繪皆合正體果爲裸昨爲醕依爲展褻爲褻則依正體不依經文通用字此其去取之得當者蹕當从亼藏當去艸說文無祧字當從故書作濯而書碑者皆不能知也至於侯禔之禔與从示而篆从禾攷鄭注小祝云禔郤凶咎則从示不从禾灼狀無疑楊南仲輩号精於小學何竟紕繆乃爾玉海引書目石經七十五卷楊南仲書周易十書十三詩二十春秋十二禮記二十獨不及周禮或是章友直張次立輩所篆不出南仲手耶據標題職喪以上爲卷五大司樂以下爲卷六知周禮當十二卷與唐石經同也黃叔璥中州金石攷言此碑今在陳留縣文廟凡二面每面六排各三十行上下不相屬一天官惟王建國至宮正徒四十人止髮人至掌舍府二人止九嬪至縫人女御八人止五日保庸至八曰山澤之賦止凡邦之小治至小

宰三日以叙作共事止六日廉辨至不用議者止一春官大宗伯若王不與祭祀至小宗伯辨吉凶止牲繫于牢至類造止享裸用虎羹至加莞席紛純止共其玉器至典命凡諸侯之適子止司隸而役之至世婦有擗事于婦人止大司樂掌成均之灋至大合止予所收屢其一面耳

福州縣廣嚴院牒

嘉祐七年十二月

右福州縣廣嚴院牒首行題中書門下隸階州福州縣廣嚴院十三大字次行細書階州福州鎮彌陀院八字蓋本名彌陀院至是賜額廣嚴也而上云福州縣下云福州鎮名目不同初疑由鎮升縣及檢太平寰宇記則福州縣唐末已有之初非嘉祐所改此疑終不能釋又攷元豐九域志階州治福州縣縣有安化利亭石門角弓河口故城六鎮然後豁然省悟蓋碑所稱福



津鎮者卽九域志之故城鎮耳寰宇記魏大統五年於今縣東北置覆津縣屬武階郡隋廢武階郡縣屬武都郡自唐景福元年再置縣邛爲福字然則故城者西魏及唐初之縣若宋階州附郭之福津縣則景福所置蓋在故城西南縣與鎮判然兩地矣寰宇記于階州下又云唐武德元年置武州領將利建威復津盤堤四縣覆津卽復津當有一誤牒尾署銜者四人禮部侍郎參知政事趙者趙槩也禮部侍郎參知政事歐陽者歐陽修也吏部侍郎平章事曾者曾公亮也刑部尙書平章事韓者韓琦也

周茂叔題名 治平四年

右周茂叔題名在永州潯山巖其文云比部員外郎通判永州軍州事周敦頤治平四年二月一日公牒歸春陵鄉里展墓三

月十三日廻至澹山巖將家人輩游姪立男壽燕姪孫蕃侍凡  
七行五十四字宋史道學傳叙元公歷官頗詳獨不及通判永  
州得此可以補史之闕史容注山谷外集云濂溪二子壽字季  
老後改元翁於熙寧五年黃裳榜登第終司封員外郎壽字通  
老後改次元於元祐三年李常寧榜登第終徽猷閣待制本傳  
但云壽終寶文閣待制而不及壽官位亦爲漏略茲因題名而  
牽連及之

張琬題名

熙寧四年十月

右張琬題名十二行行七字左行其文云熙寧辛亥冬十月十  
日琬以受代密邇蒙致政祕監劉公几伯壽侍禁陳天錫伯祥  
藍山令董清臣真甫登封縣尉魯君弼鄰右進士王哀口損之  
會飲天封觀和真庵劇談雅懽步月引退大理評事知登封縣

事張琬公玉燭下題按東坡集有次韻張琬詩施元之注云是時有兩張琬一韓城人父昇樞密使歸老嵩少元祐初琬自齊州倅求便養親兩易衛尉丞以才擢知秀州崇寧間爲廣東轉運副使移京東西路又一鄱陽人治平二年登第詩中有臨淮自古多名士之句臨淮乃泗邑疑自有一張琬而二人者皆非也愚謂治平登第之張琬據趙堯卿云字德父而此刻自署公王其爲韓城之張琬無疑矣但施氏述兩人歷官亦恐有誤攷韶州碧落洞有題名云樵參遣轉運副使番陽張琬德甫游後題崇寧三年二月則崇寧任廣東轉運者實鄱陽人非韓城人也

程師孟等題名

熙寧

右程師孟等題名正書八行行三字文云程師孟金君卿李宗

饒許彥先同游藥洲熙寧甲寅上元日題在廣東學署之九曜石又一石亦題此四人姓名而不畧年月皆予視學時晨夕摩挲而手拓其文者也以它碑參攷之師孟時以右諫議大夫知廣州充經略安撫使君卿以度支郎中爲轉運使宗儀以司封郎中提點刑獄兼提舉常平彥先以太子中舍爲轉運判官四人者唯師孟名列宋史循吏傳又吾吳人也當熙寧之世新法紛更流毒海內師孟列任方面不失循良之譽可謂難矣宋史旣入之循吏而列傳弟九十 卷復有專傳讀之終篇竟無異同當時刊修校對諸臣其失職如此柯維騏撰新編亦不能改正豈不貽笑于古也哉宗儀南康人檢泐溪石室題名知之

米黻五言絕句

熙寧八年十月

右米黻五言絕句在初陽縣之浯溪後題米黻南官五年求便

贊得長沙掾熙寧八年十月望經浯溪凡廿八字攷元章生於  
皇祐辛卯至是纔二十五歲筆力縱勁已有顏平原風格故知  
小技亦由天授也

勅祠南海廟記

熙寧甲寅

右勅祠南海廟記首稱熙寧皇帝而末題甲寅正月二十三日  
蓋熙寧七年也程師孟以守臣主祭記文極其贊揚故碑末叙  
銜不言初獻若亞獻終獻官姓名記文旣未叙入故特書於結  
銜之上此亦一例也陳之方文拖沓無法而字畫端重頗似顏  
平原未知出何人之手碑在南海廟大門外翁氏記粵東金石  
獨遺之潮陽令李南淵訪得喜甚揭兩本寄京師一以遺予一  
以遺翁學士云

真身瑞像歷年記

元豐四年五月

右東京啟聖禪院真身瑞像歷年記不詳何人所撰元豐四年  
長洲寶臨模刻其上爲梅檀佛像今在蘇州府婁門內小閤帝  
廟胡生鼎衡爲予搦得之隋書經籍志釋迦當周莊王之九年  
四月八日自母右脇而生王簡栖頭陀寺碑文云周魯二莊親  
昭夜景之鑒李善注魯莊公七年夜明佛生之日也又引史記  
周桓王崩子莊王佗立左氏傳莊公三年葬桓王然則周莊王  
魯莊公爲同時予攷春秋桓十五年天王崩卽桓王也莊王嗣  
位當於次年改元則魯莊公之七年實周莊王之十年隋志云  
九年者或傳寫偶誤爾此記云佛誕於周昭王二十四年甲寅  
則按春秋桓星不見之歲又先三百四十年與隋志及王碑皆  
相矛盾據萬斯同紀元繫攷甲寅是昭王二十六年此云二十  
四亦未合元程鉅夫梅檀佛像記稱像居西土一千二百八十

五年龜茲六十八年涼州一十四年長安一十七年江南一百七十三年淮南三百六十七年復至江南二十一年汴京一百七十六年此記則云佛涅槃一千三百零五年龜茲國生七十八年西涼一十四年長安一十七年江南一百九十二年廣陵三百五十七年從開寶乙亥歲到東京至嘉祐二年丁酉八十三年年數多寡互異又無復至江南之事

劉蒙等題名 元祐七年九月

右劉蒙等題名六行在永州朝陽巖其文云臨川劉蒙資明原武邢恕和叔河東安惇處厚元祐七年九月二十一日泛舟渡江同游朝陽巖此三人者惟蒙不見於宋史恕惇皆在姦臣之列恕本程門弟子爲溫公所知而險忤反覆遂與章蔡爲虎黨惇西蜀名士東坡送詩有舊書不厭百回讀熟讀深思子自知

之句當亦矯矯自好者其後章惇與同文獄兩人甘心爲之鷹犬欲追廢宣仁誣元祐諸賢以惇逆可謂喪心病狂者矣惇一入樞府恕僅終侍從生前所得幾何乃令後人見其姓名而罵不置小人之無忌憚可惡亦可悲也恕坐蔡確事責監永州酒吏有明文惇傳但云哲宗初政罷爲利州路轉運判官歷夔州湖北江東三路不知何由至永常攷惇廣安軍人而自署河東蓋舉郡望而言恕自題原武而史作陽武恐是史誤

王定民題名

元祐三年

右王定民題名其文云元祐三年戊辰秋八月十有六日提點刑獄朝散郎張公綬拜宣聖孔子于石鼓之學道登文會閣燕太守大□□公仲孫宣德郎衡陽令王定民檢法判官王詢新息主簿陳知元知元以是年自學徒登科羅公欲以榮激諸生



招口席未定民嘗兼教職口口焉既飲與賓客下合江亭謁韓伯留題案元祐三年禮部試蘇子瞻實知舉是科省元章援狀元李常寧知元蓋亦蘇公門下士矣新息主簿蓋其階官乃選人七資之最卑者熙豐間大興學校然諸路設教授者僅五十員荆湖南路僅潭州一員元祐初諸州相繼增教授而銜猶未預故定民得以縣令兼教職也文獻通考載崇寧諸諸州生員不及八十人罷置教授官以在州有科名官兼蒞學事則定民必有出身者

顏魯公新廟記

元祐七年

右顏魯公新廟記今在沂州府費縣顏公祠左承議郎尚書職方員外郎雲騎尉賜緋魚袋曹輔撰明州定海主簿秘書省校對黃本書籍蔡觀書輔字子方華州人元祐中與蘇黃蔡諸公

游而宋史無傳放山谷年譜引實錄元祐三年九月太僕寺丞  
曹輔權發遣福建路轉運判官此碑稱尚書職方員外郎蓋由  
運判召入郎署而秦淮海集有送曹虢州詩序云熙國曹子方  
自尚書郎出守又述子方之言云待罪司勳初無裨補是子方  
由職方又改司勳而出知虢州也予又見粵西曾公巖有提點  
刑獄曹輔子方題名後題紹聖乙亥季秋是又由知州遷廣西  
提刑其後事則不可攷矣秦少游結銜稱定海主簿者選人階  
官非正授之職據續通鑑長編元祐六年六月以秦觀爲祕書  
省正字八月罷正字依舊校對黃本書籍故此碑仍稱主簿雖  
在館職猶未脫選籍也近秦氏輯淮海年譜以除正字繫之元  
祐四年證之石刻可決其誤揮塵錄元祐中重寫御前書籍又  
置校對黃本以館職資淺者爲之又置重修晉書局不久皆罷

去此職之罷大約在紹聖以後也

左中散大夫徐師閔墓誌 元祐八年十一月

右左中散大夫徐師閔墓誌宋世士大夫宦成之後多不歸故鄉閩人如南北章氏皆居吳中師閔建州建安人而居於蘇列吳中十老之一其葬在吳縣蒸山龍窩塢當時風俗皆然不以爲異也師閔父爽大中祥符五年進士第一官翰林學士師閔官亦不卑而史皆無傳有歌詩二十卷雜文十卷藝文志亦未載入蔣堂字希魯與師閔父同年故有同年丈人之稱予初得此碑疑元祐四年寄祿官初分左右此碑署銜黃履稱左朝散大夫章衡稱左朝議大夫當矣師閔非進士出身何以得稱左蔣之奇官太中大夫何以不帶左右沈思積日夜卧不寐忽若有悟起檢琴川志引哲宗舊實錄云元祐四年十一月三省

言承務郎以上至朝請大夫欲分左右進士加左字餘官加右字從之中散大夫班在朝請之上固不在分左右之例矣王明清揮塵前錄言官制後惟光祿大夫及中散朝議三大夫分左右增磨勘而已初非以科第也今攷元豐改官制時光祿中散朝議三階元不分左右哲宗朝始分之碑云上卽位改中散大夫其時尚未分左右也後以子貴進左中散大夫蓋自右轉左不係有出身與否也太中大夫本無左右之分於是兩疑頓釋而章衡之左朝議亦由磨勘叙進與師閔同

唐太宗昭陵圖

紹聖元年

右唐太宗昭陵圖宋紹聖元年端午日武功游師雄景叔所刻肅宗建陵附見左方元和郡縣志昭陵在醴泉縣東北二十五里此圖云縣北至昭陵五十里蓋宋之醴泉非唐故城矣碑云

諸蕃君長貞觀中擒伏歸和者琢石肖形狀而刻其官名凡十四人今依其所列數之曰突厥頡利可汗左衛大將軍阿史那咄苾曰突厥利可汗左衛大將軍阿史那咄苾曰突厥乙咄泥孰俟利苾可汗右武衛大將軍阿史那祿不曰薛延陀真珠毗伽可汗吐蕃贊普曰新羅樂浪郡王金真德曰吐谷渾河源郡王烏地拔曰勒豆可汗慕容諾曷鉢曰龜茲王訶黎布失布失畢于闐信曰焉耆王龍突騎支曰高昌王右武衛將軍麴智勇曰林邑王范頊利曰婆羅門帝那伏帝國王阿那順止十二人耳予以新舊唐書及文獻通考再三推校乃知吐蕃與薛延陀本非一部而于闐信當爲于闐王伏闐信亦不當承龜茲之下析此二國恰合十四之數此又當據史以糾石刻之誤者也

祠山鐵像題字

右祠山鐵像題字甲寅歲罷堦鏡齋游廣德州謁祠山廟拓其  
文見貼且言兩像甚鉅東西相對焉開左右若蔽膝者各二皆  
有文字一爲紹聖二年乙亥正月廟祝陳述明題一爲紹聖丁  
丑三月胡庶題皆有緣化急脚子李文安名丁丑者紹聖之四  
年蓋閏兩年有餘始藏事也字畫端整極有唐人法度但陽文  
隱起不如陰識之易拓耳周秉秀祠山事要載胡庶靈濟王碑  
云元豐元年春有詔取士庶將赴試國學而進止未決夜夢王  
語庶曰汝來年登第矣二年春果如其夢庶廣德人嘗爲南陵  
縣主簿碑立於元豐三年鑄像題字又在立碑後十八年也秉  
秀誤據湯景仁記以爲當在崇寧因譏編年之譌又謂不當添  
胡庶姓名然此像字畫分明秉秀何竟不一寓目而輒以凡斷  
耶

關山月關山雪詩 紹聖丙子

右關山月關山雪詩在隴州大佛寺題云成都宋構承之紹聖  
丙子歲按部過隴山偶題按宋史不立構傳而東坡集有送宋  
構朝散知彭州迎侍二親詩施元之注宋彭州名構紹聖間爲  
金部員外郎是時都大提舉川茶事陸師閔移漕陝西謀代之  
者曾子宣李邦直僉曰宋某可遂使權都大管勾攷熙寧中設  
成都茶司其後改名都大提舉茶馬司凡市馬於蕃夷以茶易  
之此刻於紹聖間構雖管勾川茶而市易常於秦隴故有按部  
隴山之語

程閔中等題名 元符己卯

右程閔中等題名凡七行文云程閔中點青田常役廖君憲漕  
臺校試還攝永嘉管勾邂逅遊己卯閏月二十三日去年何夢

卒自青田石門山拓以見贈并貽書詢已卯係何年号予以漕司校試起于宋時若今之鄉試此題當是宋刻南渡後避高宗嫌名易管勾爲幹辦而此刻稱管勾則必北宋刻矣熙寧新法以後始重役法閔中差熙寧役其在元符二年乎是歲歲在己卯又問九月與石刻正合

劉晦叔等題名 崇寧元年季春

右劉晦叔等題名行書五行文云崇寧元年季春十七日汝口劉晦叔東平畢公叔三封宋仙民蒲陽蔡元長同來元長者京之字也攷宋史姦臣傳徽宗卽位出知江寧頗快快不之官御史交論其惡奪職提舉洞霄宮居杭州童貫以供奉官留杭州累月京與游不舍晝夜附語言論奏至帝所由是帝屬意京起知定州崇寧元年徙大名府韓忠彥與曾布交惡謀引京自助



復用爲學士承旨此題名在盱眙縣之玻璃泉蓋由杭赴闕所經之地雖雨除大郡皆未到官而其月卽有承旨之命又兩月遂登政府矣發回之進退乃宋祚存亡所關故攷而論之

太原府帖

崇寧二年九月

右太原府帖帖後列銜者八人權河東節度推官石權太原府觀察判官鄭宣義郎監在府稅務權節推張承事郎簽書河東節度判官廳事王朝散郎通判太原軍府事蔡朝奉大夫通判太原軍府事陳龍圖學士朝奉大夫知太原軍府事范皆書押而不名最後一行云皇兄河東山南西道節度使守太師開府儀同三司太原牧兼典原牧陳王蓋徽宗之兄似封申王者也宋時諸王外戚領節度使者皆不之鎮而府帖猶存其銜苟注在京字此一代典故見于石刻攷官制者所宜知也帖首一

行云太原府帖壽陽縣方山昭化禪院帖中載是年八月三省同奉聖旨摩騰賜号啟道圓通大法師法蘭賜号闡教惣持大法師傅大士賜号等空紹覺大士李長者賜号顯教妙嚴長者定應大師賜号定光圓應大師其婺州雙林寺并太原府壽陽縣方山昭化禪院西京白馬寺汀州武平縣南安巖均慶禪院今後每遇聖節各許進奉功德疏內雙林寺回賜度牒貳道餘叁處各壹道今唯方山尙存此帖餘蔑有聞矣山南西道節度例兼興元尹皇子或稱收此帖作興原收未審其由

### 黃庭堅題名

右黃庭堅題名在涪溪東崖文云余與陶介石游涪溪尋元次山遺跡如中興頌嶠臺銘右堂銘皆衆所共知也與介石裴回其下想慕其人實深千載尙友之心最後於唐亭東崖披翦榛

穢得次山銘刻數百字皆江華令瞿令問玉筋篆筆畫□□優  
于嵒臺銘也故書遺長老新公俾刻之□壁以遺後人山谷老  
人書凡十有六行不題年月以山谷年譜攷之當在崇寧三年  
三月蓋自鄂州赴宜州謫所道所經也介石名豫長老名伯新  
黃芻撰年譜唯載磨崖碑後題名而不及此題故具錄之予曷  
跋唐廡銘據說文謂廡與膏同訓小堂不當初作亭字今山谷  
題已作亭又陳衍題悟溪圖云元氏始命之意因水以爲治溪  
因山以爲嵒臺作屋以爲唐亭三吾之稱我所自也歐陽公集  
古錄亦作唐亭頃於何君元錫齋見所拓磨崖大字有云唐亭  
磴道者有云唐亭銘者驗其筆蹤似唐人所題則讀廡爲亭沿  
譌已久六書之不講豈獨近代爲然哉

元祐黨籍碑

崇寧三年

右元祐黨籍碑徽宗朝元有兩本崇寧元年九月己亥蔡京籍文臣執政官文彥博等二十二人待制以上官蘇軾等三十五人餘官秦觀等四十八人內臣張士良等八人武臣王獻可等四人謂之姦黨請御書刻石于端禮門二年九月臣僚乞以御書刊石端禮門姓名下外路州軍於監司長吏廳立石刊記從之此初本也崇寧三年六月戊午詔重定元祐元符黨人及上書邪等者合爲一籍通三百九人刻石朝堂文臣曾任宰臣執政官司馬光等二十七人待制以上官蘇軾等四十九人餘官秦觀等一百七十七人武臣張興等二十五人內臣梁惟簡等二十九人爲臣不忠曾任宰臣王珪章惇二人御書刊石置文德殿門東壁又詔蔡京書頒之州縣令皆刻石此再刻本也崇寧五年正月以星變除毀朝堂石刻如外處有姦黨石刻亦令

除毀而元刻無有存者今世所傳乃南宋人所翻三百九人之  
本一在靜江府有慶元戊午饒祖堯跋一在融州有嘉定辛未  
沈暉跋饒本字畫較大於諸臣身故者名下注一故字與沈本  
異沈本末一行爲臣不忠曾任宰臣王珪章惇兩人饒本有惇  
無珪饒本內臣有王化臣一人沈本無之袁公造饒本誤袁爲  
充馮百藥沈本誤馮爲洪興夫饒本誤作史饒本額元祐黨籍  
四字八分書沈本額元祐黨籍碑五字正書按崇寧詔書云三  
百九人以兩碑所列姓名數之皆闕其一當於饒本增入王珪  
一人沈本增王化臣一人乃得其實餘官內湯磻以下四十八  
人當移於衡鈞之前則兩本皆誤當依宋史新編正之嗟乎是  
非之心人皆有之也而姦臣欲以紹述之說奪之紹述爲孝則  
更改爲姦人主聽之亦若近理雖然忠孝者一家之私也是非

者萬世之公也文武之子孫以紹述爲孝幽厲之子孫亦可以紹述爲孝乎神宗所用之人所擬之法海內皆以爲非獨其臣子是之又以議論之不能勝而假威力以勝之而人心終不服也人主之權能行於一時不能行於萬世讀黨籍之碑崇寧君臣幾大快于心矣豈知人心所不服卽天心所不祐向以入此籍爲辱者後且以不得與此籍爲恥矣若夫曾布張商英楊畏之翻覆無特操者蔡京雖抑之而後世終不能揚之此又由于其人之能自立而非可僥倖以取名也予嘗讀新定續志知淳安縣學亦有元祐黨籍碑縣尉司馬逖所刊不審今尙存否

耀州靜應廟牒及妙應真人告詞

崇寧三年十月

右耀州靜應廟牒及妙應真人告詞同刻一石上層首行題尙書省滕耀州靜應廟後題崇寧二年八月二十一日其云右正

議大夫守右丞吳者居厚也云左銀青光祿大夫守左僕射而無姓者蔡京也下層首行云勅耀州華原縣孫真人勅後列銜者中書令國中書侍郎臣趙挺之宣奉日中書舍人臣慕容彥逢行奉勅如右牒到奉行日侍中國日尙書左僕射兼門下侍郎京日門下侍郎將日給事中時彥崇寧三年二月二十九日戊時日都事康繼隆受日左司員外郎方會付吏部日尙書令國日尙書左僕射京日尙書右僕射國日尙書左丞國日尙書右丞居厚日吏部尙書執中日吏部侍郎洵仁告妙應真人奉勅如右符到奉行日主事李孝恭郎中給令史李遵書令史張應三月五日下午蓋三省例由中書取旨門下錄黃而後尙書奉行其次弟如此中書省承旨之地故省官稱臣具姓名門下尙書兩省官有名無姓亦不稱臣都事主事令史等以卑故具姓

名此當時案牘之式非睹石刻不能知也許將何執中鄧洵仁  
史皆有傳攷宋時寄祿官分左右始於元祐四年而其中又有  
兩等自承務郎以上至朝請大夫皆進士爲左任子爲右此以  
流品分者也若朝議若中散若正議若光祿若銀青光祿亦分  
左右則以元豐官制遷轉太易故增其階級以便磨勘不係乎  
有出身與否也紹聖二年罷朝請大夫以下分左右而中散以  
上五階猶仍左右之名此碑左銀青光祿大夫蔡京右正議大  
夫吳居厚是也洎大觀二年始以奉直易右朝議中奉易左中  
散通奉易左正議正奉易右光祿宜奉易左光祿而右銀青光  
祿正爲光祿而盡去左右字終宋之世因之矣宰輔編年錄崇  
寧二年正月蔡京自右僕射授右光祿大夫尙書左僕射七月  
克復澶州除左銀青光祿大夫與碑正合吳居厚以是年四月



自戶部尚書除中大夫尚書右丞不知何時轉右正議大夫想亦以渥州之功例轉三官乎王紫書秀逸可喜而世罕知之者

富口榮題名 大觀二年六月

石富口榮題名文云大觀二年戊子六月十二日朝奉郎富口榮緣宗室財司事至青社因過石子澗來雲門山讀伯父文忠公慶歷八年題石今已六十一年感念徘徊向晚之昌榮凡五行正書在青州雲門山字畫完好唯名上一字變患不可辨按富鄭公諸子第一字皆用紹字此君之名疑是紹榮也

先之等題名

政和壬辰季秋

右先之等題名二通一在龍隱巖一在會公巖洞口皆李南潤官廣西日所贈先之李朴字也史稱其嘗爲肇慶府四會令又爲廣東安撫司主管機宜文字不知何時入粵西也二刻皆題

政和壬辰季秋實政和政元之二年

朝奉郎孫觀墓誌 政和六年十月

右朝奉郎孫觀墓誌朝奉郎行祕書省校書郎兼國史編脩編脩六典檢閱文字賜緋魚袋許翰撰并書承議郎祕書省著作郎編脩六典檢閱文字李敦義篆蓋觀字明之兗州泗水人其長孫傳字聖求以辭學兼茂高選爲祕書省正字攷宋史列傳有孫傳字伯野海州人登進士第中詞學兼茂科兩人籍貫既異字亦不同而同時中詞學兼茂科兗海亦相接壤未審其爲一人與否也宋時官觀名目略見於職官志皆熙寧所定之制至崇寧三年添官觀十政和三年添官觀三十雖見文獻通攷而未詳其名今據此碑有提點南康軍逍遙觀元祐黨籍碑跋有提點杭州集真觀而游酢嘗提點成都府長生觀楊時嘗提

點成都府國寧觀又提點均州明道觀此殆崇寧政和所添置者其銜稱提點殆下于提舉一等矣頃讀吳虎臣能改齋漫錄載政和八年五月戶部幹當公事李寬奏欲望凡以聖爲名字者並行禁止奉聖旨依乃知孫傳改字出於當時避忌實非兩人覲莫今在泰安則傳爲兗州人無疑也

武佑廟尙書省牒

宣和三年六月

右武佑廟尙書省牒今在蕭山縣牒尾列銜者三人其云少保太宰不書姓者王黼也通議大夫守左丞張者張邦昌也中大夫守右丞王者王安中也最後小字一行云建炎二年正月朔奉即知越州蕭山縣事賜緋魚袋付立石付君南豐人文定公輩之孫見宋史忠義傳建炎三年金人陷越爲其帥所執不屈全家被害史但稱通判溫州須次于越而失書知蕭山縣今

以碑文參攷蓋由蕭山推升過判未及到官猶在越耳

少蘊等題名

宣和癸卯四月

右少蘊等題名在長興縣丁氏邢佺山明府拓其文寄予字畫甚完好文云少蘊無言慧覺道人宣和癸卯四月辛亥同來凡三行十八字少蘊葉夢得也無言劉蕡也高璉卞山志云予見異石于丁氏曰孔耳石高可四尺形如人耳色黑而水紋甚細鐫曰致虛無言夢得道人宣和癸卯渡江同來蓋葉石林故物也今此石尙無恙而題名與志異者六字乃知前人紀述之疏石林題名石上未必卽爲石林故物亦想當然耳

蘇過題名

癸卯九月

右蘇過題名在定州天寧寺大殿壁間正書六行行九字文云大帥延康陳公邀廉訪梁公飯素天寧仍率其屬游企盛俞蘇

過王執中趙奇韓楫同來孫仲舉王昭明劉用之皆與癸卯九月七日過題其文左行宋時定州守臣例帶本路安撫使兼馬步軍都總管故有大帥之稱陳公蓋以延康殿學士知定州者其名則不可攷矣癸卯蓋徽宗宣和五年也叔黨書勁挺有家法而流傳絕少乾隆庚戌秋予以祝

釐入都還過定州間天寧有叔黨石刻親往訪得之

潛研堂金石文跋尾續卷五

嘉定錢大昕

宋

似渠等題名

紹興五年閏二月

右似渠等題名在廣西省城之疊綵山益都李南潤官郡丞日捐以遺予似渠者李彌大字也攷宋史本傳彌大嘗知靜江府此刻蓋在守郡日也渠古矩字傳作似矩蓋从俗體此刻乃篆書故侶渠兩文悉合於正可見無礙居士之精於小學矣

董令升題名

紹興乙卯

右董令升題名篆書十二行首云青社董令升罷官廣西還過零陵來遊淡山令升名分徽猷閣待制迨之子兩世皆有文學令升以不肖禁程氏學被黜亦南渡人士之卓卓可稱者而史不爲立傳不知其在廣西居何職也未題紹興乙卯歲春三月

戊寅依篆體卽西字而紹興紀號卅二年間不值乙酉歲當是紹興五年乙卯卽卽篆形相似摹刻時容有差謬爾攷李心傳繫年要錄紹興六年夆自起居舍人遷中書舍人兼權禮部侍郎七年正月以集英殿修撰知衢州五月改提舉江州太平觀閏十月轉衛尉閣待制九年知嚴州以殿中侍御史周葵論劾落職與宮觀廿二年復以徽猷閣待制提舉台州崇道觀尋落職廿六年以左中大夫知婺州卅二年提舉洪州玉隆觀引年告老詔復敕文閣待制復爲言者所論降集英殿修撰然則孝宗隆興乙酉在令升告老後三年無緣遠官嶺外此題名爲紹興五年可無疑也據繫年錄紹興五年閏二月有廣西提點刑獄事董夆名與碑稱罷官廣西相合故定以爲鐫刻之謄

汪藻題名

紹興戊午中春

右汪藻題名亦在顧清山明月峽其文云龍圖閣直學士前知  
湖州□□汪藻新知無爲軍括蒼□□祖知長興縣安肅張琮  
前歙縣丞汝陰孟處義前監南嶽廟吳興劉唐稽紹興戊午中  
春來游右承務郎汪惺汪恪從行戊午者紹興八年也湖州府  
志題名汪藻紹興元年十一月到任四年九月移撫州宋史本  
傳於湖州貶秩停官之後亦有起知撫州語而後述紹興六年  
奉詔修書八年書成事似戊午歲不當在湖州又不云前知撫  
州而云湖州亦似可疑今按藻本以湖州未經寇亂公私文書  
完備故欲就州置局後雖有移撫州之命卽爲御史論罷仍留  
湖州及六年仍命復卒前業賜史館修撰錢聽梓僚屬其在  
湖州不問可知撫州旣未到任則宜稱前知湖州矣鮑延祖孟  
處義二人卽藻所辟屬官此刻括蒼下所脫必鮑延兩字也劉



唐稽字林宗樞密珪之子藻在翰林日嘗薦諸朝故並在同游之列汪悟汪恪卽藻之二子浮溪集有悟硯恪硯兩銘可證宋史本傳子六人有恪無悟蓋轉刻之謬當據石刻正之

向子諲題名 紹興八年十二月

右向子諲題名在虎邱石觀音殿壁間其文云子諲秋八月壬申到郡冬十月庚午乞還印綬章上屢却十二月癸丑詔許歸鄉林乘泛宅艤虎邱而去紹興八年河內向子諲伯恭父題攷宋史本傳子諲以徽猷閣直學士知平江府金使議和將入境子諲不冒拜金詔乃上章言自古人主屈已和戎未聞甚於此時宜卻勿受忤秦相意遂致仕正其時也樓大防薊林居士文集序云建炎初元罷六路漕明年歸臨江紹興八年起知平江力辭不克次年三月復歸自是不出優游十五年以壽終據石

刻是年少二月已去郡其歸蘇林當在次年矣序又云公卜居臨江多植巖桂又素慕香山自號曰蘇林有船曰泛宅高宗親書四大字及企疏堂以寵其歸此紹興壬子歲事故述懷詩云我與淵明同甲子歸休已恨七年遲其時蘇林年四十有八至是再歸行年五十有四矣子謹敏中之元孫史於敏中傳稱開封人子謹傳稱臨江人此題河內者舉族望言之猶蘇子瞻世居胥州而自署趙郡也

述南夫等題名

紹興九年二月

右述南夫等題名凡七行刻於九曜石文云紹興九年歲在己未二月初吉藥洲春水新漲小舟初成述南夫鵬舉口正明甫周利見公遇王勲上達量公邁伯咎載酒同游以廣東通志攷之南夫嘗官廣東轉運使後知廣州利見官轉運判官公邁官

提舉常平餘二人不可知矣直齋書錄解題有連實學奏議二卷實文閣學士安陸連南夫鵬舉撰紹興初知饒州并禦有功及和議成南夫知泉州上表曰不信亦信其然豈然又曰雖虞舜之十二州昔皆吾有然商於之六百里當念爾欺由是得罪則南夫乃鰥直之士也公遺詠之子所著歷代紀年十卷今猶有傳本又號傳密居士見直齋書錄利見官左朝請郎贈金紫光祿大夫卽益公必大之世父見渭南文集

高宗御書石經

紹興十三年九月

右高宗御書石經王應麟玉海紹興十三年二月內出御書左氏春秋及史記列傳於秘書省宣示館職是年六月內出御書周易九月四日御書尚書終篇刊石頒諸州學十四年正月出御書尚書十月出御書毛詩十六年五月又出御書春秋左傳

皆祕省宣示館職觀畢進詩上又書論語孟子皆刊石立于太  
學首善閣及大成殿後三禮堂之廊廡今杭州府學卽宋太學  
之舊石刻諸經散佚不完僅存易二書六詩十春秋四十中庸  
一論語七孟子十一凡七十有七石每石分四層刻之毛詩論  
語卷末皆有紹興癸亥歲九月甲子尚書左僕射同中書門下  
平章事兼樞密使秦檜題記思陵小楷結體整秀有晉人法論  
孟字體較大而勢稍縱逸結體在真行之間其中避諱缺筆如  
殷爲殷恒爲恒又爲恒貞爲貞敬爲敬佶爲仕之類皆不改字  
論語欬事而信溫良恭儉遜商因於夏禮得見有常者孟子無  
辭遜之心措克在位則有責用下欽上則非改字矣然如言不  
篤敬事君敬其事之類仍不盡改蓋一時隨筆所作無義例也  
經文大率與今本同唯詩鴟鴞予尾脩脩竹竿遠兄弟父母圖

有桃不我知者謂我士也驕不我知者謂我士也罔極左傳焉  
用亡鄭以陪隣不闢秦焉取之少齊有寵而死武王有亂十人  
皆與開成刻同勝於它本孟子無唐以前石刻此碑文王事混  
夷有小民之事亦較今本爲善

張浚列秀亭題名

紹興十七年

右張浚列秀亭題名文云張浚紹興丙寅秋被命謫居陽山姪  
杆男拭侍行重陽口口抵郡境授館濯纓堂因晴夕必登列秀  
亭周覽風物少釋懷親之思眉山史堯弼自星沙偕來表弟臨  
邛計孝偁以秦國意繼至省問丁卯寒食日題秦國者魏公之  
母計氏封號也魏公謫居連州甚久唯此刻與紹興己巳清明  
前一日游燕喜亭題名尚無恙耳張杆字介仲嘗知廣德軍刻  
史記于郡齋

王光祖題名

乾道八年十月

右王光祖題名文云乾道八年冬十月二十有五知衡陽縣  
睢陽王光祖仲顯適攝郡事燕新進士王若仁鄧友龍友口于  
石鼓州學是年三人皆自郡庠登科用以榮激諸生教授建安  
虞口司戶廬陵口景先學正劉渥學錄董正之預焉酒半下合  
江亭游西谿觀石門元祐三年王公定民留題適與今日相符  
云云按范至能合江亭詩序云合江亭卽石鼓書院今爲衡州  
學宮韓文公所謂深潭不可唾者卽此處故碑有石鼓州學之  
稱也范集中與王仲顯唱和之作甚多其題仲顯讀書樓詩云  
使君青箱家文史裴橫抱平生名教樂雙旌不滿笑忽乘雪溪  
興來棧秦淮棹邱亭客漂泊夜夜短檠照人云大疑絕我自新  
輪妙今朝檣竿起昨夢繞閣阜云有百尺樓歸寄北窗微滴露

細朱黃拂塵靜細標意仲穎家於江西者數此與元祐王定民  
兩刻皆在衡陽縣石鼓山之西谿儀徵江子九令清泉爲予拓  
致之

新忠武王韓世忠碑

淳熙

右新忠武王韓世忠碑在吳縣靈巖山之麓予少時偕王琴德  
吳企晉曹來殷輩爲上沙之游屢摩挲焉歸田後從吏有力者  
拓其文輒以架木懸梯爲難取陽城張古餘攝守吳郡與予同  
嗜募工揭十餘紙分其一見時懸壁間數十年訪求之勤藉  
一慰亦晚年快事也其額云中興佐命定國元勳之碑下題選  
德殿書蓋孝宗御筆碑文首尾萬餘言則禮部尚書趙雄奉勅  
撰石刻頗有曼思以杜大圭名臣碑傳所錄全文細校無甚異  
同碑云娶白氏秦國夫人梁氏揚國夫人茹氏秦國夫人其下

空六字以名臣碑傳校之則周氏新國夫人也宋錫鬯詩新王  
墓近古梧宮暨六夫人祔葬同與碑不合未識何據潘次耕詩  
碑高三丈字如掌帝製鴻文盛褒獎則誤仞碑文爲御製失之  
甚矣碑云紹興二十一年八月四日薨享年六十有三與宋史  
同而元大一統志延安人物傳云紹興十七年卒年六十二蓋  
修志之時宋史未出志家得諸傳聞故多誤耳碑末未見建立  
年月而碑首云上續祔之十五年攷孝宗受禪在紹興壬午次  
年癸未攷元隆興至淳熙四年丁酉恰十有五年此碑必立於  
丁酉歲也

范至能題名

淳熙戊午孟冬

右范至能題名在包山賜谷洞石壁予以丁酉秋游林屋訪得  
之未及推搨嘉慶丁巳十一月再游始命工榻其文凡五行行



七字云范至先至能張元直同游林屋洞天至先之子藏及現  
壽二長老俱淳熙戊戌孟冬朔攷宋史宰輔表淳熙五年戊戌  
四月丙寅范成大自禮部尙書兼直學士院遷中大夫除參知  
政事六月甲戌范成大罷參政以資政殿學士知婺州本傳但  
云拜參知政事兩月爲言者所論奉祠不及知婺州事蓋婺州  
之命雖下未到任而卽奉祠也此刻題孟冬朔正石湖奉祠里  
居時以水月洞銘較之筆蹤相似其爲石湖書無疑至先名成  
象紹興五年汪應辰榜進士官工部郎中石湖之從兄也玉峯  
志以爲石湖弟殊誤石湖詩集卷廿六有再贈壽老詩云澹齋  
寂寞澹庵空玉柱金庭一夢中我病君衰猶見在莫嫌俱作白  
頭翁自注頃與澹齋兄游洞庭林屋并澹庵現老眉庵壽老偕  
今十年矣壽老見過話舊事二澹已爲古人正紀戊戌題名事

潘齋卽至先也

史彌大等題名

淳熙辛丑季秋

右史彌大等題名文云四明史彌大方叔山陰賀錫叔況淳熙辛丑季秋廿有六日以迓客同來凡四行八分書在盱眙縣之第一山蓋自乾道與金通和以後兩國交聘必取道盱眙凡宋臣使北及接伴北使而至者皆題名佳石間此其一也孝宗以十月廿二日生號會慶節此所迓者蓋賀生辰使以金史交聘表攷之則宗室胡什賚鄧儀也彌大浩之長子乾道五年進士官至禮部侍郎

黃由等題名

紹熙辛亥

右黃由等題名四行文云黃由張宗益以使事同來憑高望遠爲之慨然紹熙辛亥冬至前一日接宋史光宗紀紹熙二年九

月遣黃申等使金賀正旦金史交聘表明昌三年正月乙巳朔  
宋煥章閣學士黃申明州觀察使張宗益賀正旦卽是此事但  
宋史紀差遣之日金史紀入賀之日故年月各殊耳黃由字子  
由蘇州人淳熙八年進士第一人及第官至寶謨閣學士刑部  
尙書直學士院兩史皆譌由爲申當據石刻正之

勅靈濟五龍侯封爵告詞

和熙四年五月

右勅靈濟五龍侯封爵告詞凡五篇分五層刻之五侯之號曰  
東靈侯西誠侯中應侯南平侯北寧侯其告詞則一字不易也  
五龍皆封侯爵而告詞首稱第壹位龍王等蓋龍王者十俗相  
尊之稱當以出於朝會爲尊以王封侯義無所嫌宋時禮官猶  
知大體如此

御書通神庵三字

慶元三年九月

右通神庵三字孝宗御書後題賜通神先生銘以御書之寶而  
不署年月其下方有通神先生裴衣何真人事實一篇承直郎  
胡襄撰以宋史方技傳校之無甚異同而史較詳史文襄作莎  
莎襄同音而義別莎艸不開可製衣也碑云慶元三年五月十  
十二日夜端坐解化史云慶元六年卒者誤碑云是歲九月十  
一日葬於長洲縣金鵝鄉里燕塘之原今俗傳庵中像爲真身  
亦妄也甲寅六月與段若膺袁又愷戈小蓮程鏡濤及羽士袁  
月渚問道藏於圓妙觀月渚導予往觀此石捐其文見詒因題  
識而弄之

張釜等題名

慶元丙辰季冬

右張釜等題名在盱眙縣第一山其文云丹陽張釜開封耿興  
義被命肅客末題慶元丙辰冬季四日蓋以接伴金國賀正旦

使而至也。益以慶元元年乙卯知廣州。次年春猶在粵而其冬已有接伴使臣之命。則被召卽在是年。但未審此時任何職耳。慶元丙辰卽金承安元年。所肅客爲完顏崇道。其副使則無可攷矣。

萬壽山修觀音祠記

慶元五年六月

右萬壽山修觀音祠記末題承議郎宜差通判階州軍州兼管內勸農營田事賜緋魚袋劉震書并篆蓋古者墓有兩石一瑤誌銘一書某官某府君墓覆於誌石之上故有篆蓋之稱。若宋游師雄墓誌全用碑式其篆卽刻于額而尚沿篆蓋之名已失其義。此祠記當稱篆額而亦云篆蓋此古聖所譏。祇不祇者也。宜差者帥臣便宜差遣未奉朝命之稱。予向讀景定建康志卷首題承直郎宜差充江南東路安撫使司幹辦公事周應合修。

纂或疑爲宜差之譌予細檢志中或稱宜差或稱宜特改差者不一而足則當時必有是衝今讀此碑亦有宜差之稱字畫分明可證其非誤矣碑在階州金石家未有著錄者今長興宰邢君佺山揭以貽予甘肅少南宋刻而篆書法頗似唐人尤難得也

修長洲縣主簿廳記 慶元六年三月

石修長洲縣主簿廳記長樂黃士特文山陰孫應時書浚儀盧瑋隸額攷宋史藝文志孫應時有燭湖集十卷今集已不傳王厚齋困學紀聞載其讀通鑑詩二絕云爲朱文公所稱不知其行楷整逸尤可喜也記文云主簿廳在縣治少西宋時縣治在州治東北今州縣治皆遷徙此碑不知何時移置長洲縣學羅堦鏡濤揭一本眎予文尙完好唯黃君名上一字漫漶據府志

補之士特字仲誼見嘉泰元年靜江府隱山題名宋時福州人  
每自稱三山或稱長樂故彼云三山此云長樂也

虞泉銘

嘉定庚午七月

右虞泉銘莆田方信孺撰劉後村爲信孺行狀稱公爲文未嘗  
起艸初若不入思細視皆平夷妥帖無斧鑿痕今觀此銘良然  
真孺當是信孺昆弟八分書亦有法而書史不載其名

詩境二字

嘉定辛未九月

右詩境二大字陸放翁爲方信孺作也書於開禧丁卯三月翁  
年已八十有三而腕力道健不減少壯時又四年爲嘉定辛未  
信孺守韶州乃摸而刻之翁已不及見矣宋史陸游傳云嘉定  
二年卒年八十五陳氏書錄解題則云嘉定庚午年八十六而  
終今攷劔南續藝最後一篇云嘉定三年正月後不知更解幾

春風則是庚午正月放翁尚无恙伯玉所言蓋得其實信孺字  
孚若莆田人朝請大夫京西轉運判官崧卿之子崧卿撰韓文  
舉正朱文公攷異實取之宋史不見其名於信孺傳亦闕漏也

提舉常平司公據

寶慶元年八月

右提舉常平司公據在蘇州府雙塔寺前提舉常平司五字後  
右今出給公據付雙塔寺仰收執照寶慶元年六月日給廿二  
字字皆大最後一行使字更大下有押而不署姓蓋當時公牘  
之式如此宋時平江府爲兩浙西路提舉治所則此爲浙西提  
舉司之公據也寺在宋爲壽寧萬歲禪院提舉司建祝聖道場  
于此向例每日納官醋錢壹佰肆拾文是歲知事僧德齊狀乞  
照舊壽承天開元永定四處體例蠲免而提舉司給與公據俾  
爲異日左驗給據在是年六月又兩閱月而刻于石最下一層



則住山僧師哲跋也酒醋民間日用所需而宋元禁百姓私造  
官取其息卽一寺計之每歲合輸數萬錢則人戶之抑配可知  
今郡城有醋坊橋有醋庫巷猶沿宋名知醋之累民甚矣宋時  
唯御史稱臺而寺僧狀稱提舉爲使臺蓋里俗相沿之詞如轉  
運曰漕臺提刑曰憲臺提舉名倉臺此類見于牋啟者不能悉  
數也

梅影庵記 紹定二年十二月

右梅影庵記紹定初道人陳一如所建四明樓治書梅隱二字  
榜之新慶元府鄞縣主簿范元衡爲記新知江州德化縣趙繼  
書宗學諭方萬里篆其額却自稱題蓋攷唐人誌墓用兩石相  
覆一書誌文一大書某官某君某誌故不云額而云蓋其云題  
額題蓋則別于篆而言之此記與額無二石又作小篆體而襲

題蓋之名兩失之矣昔黃山谷言庵字當从艸以从广爲俗體此篆額菴从艸蓋依山谷說予謂庵菴兩字說文皆無之菴同雖見相如賦本是奄字後人增加艸旁已非相如之舊釋名云艸圓屋爲蒲又謂之庵廣雅云庵舍也是庵字漢人已有之吾未見菴古而庵俗也如依說文正當作奄或取屋舍義則當爲閭或通作陰耳影亦葛洪字苑所收俗字萬里淺人固未可與言六書之正矣蘇州府志不載梅影菴未知遺址所在獨此碑嵌瑞光寺大殿壁間前人亦無著錄者趙絳嘉泰二年進士方萬里嘉定二年進士並見吳郡志

袁肅簡華老詩

紹定五年二月

右袁肅簡華老二詩華老者雙塔住持僧普華也石刻今在寺中篆額兩行文云提舉祕丞郎中袁公詞翰碑分三層上兩層

分刻兩詩下一層則普華跋也前詩在華老未至之時佛慧當是華老師故兼簡之欲促其行耳後詩則華已到雙塔矣吳郡志提舉題名止于寶慶故不及肅名宋史亦無肅傳攷中興館閣續錄知爲鄞縣人也

理宗賜杜範勅 嘉熙三年七月

右理宗賜杜範勅凡七行首行勅字上鈐書詔之寶後題二十六日不署年月未行一勅字極大又有勅杜範三字亦鈐書詔之寶外周有長方界似是封皮也下方有杜範跋後題嘉熙三年七月日朝奉郎右文殿修其下皆闕唯存拜手稽首謹書六字以本傳攷之云嘉熙二年差知寧國府明年至郡四年還朝則嘉熙三年正範在郡日也宋時差遣以帶職爲榮故吏於寄祿官多不書範官朝奉郎固可不載其餘右文殿修撰亦不書

則史之闕漏矣。勅文云：拜命相臣肇開督府，聯合吳蜀，表裏江淮。謂史尚之以右丞相督視兩淮、四川、京湖軍馬兼督江西湖南軍馬也。碑在寧國府署前宣城張惺齋搨以遺子。

黃朴題名 嘉熙庚子孟秋

右黃朴題名正書七行在廣東提學署後圃九曜石上其文云：嘉熙庚子孟秋長樂黃朴成甫約同郡唐璠伯玉莆田劉克莊潛夫泛舟仙湖予嘗讀後村集譜其歷任歲月蓋嘉熙元年丁酉由侍右郎官免歸主管成都玉局觀二年戊戌除知袁州三年己亥改主管華州雲臺觀其九月除提舉江西常平以從弟嫌辭十月改除廣東提舉四年庚子春到廣東任又權郡事其秋遷廣東漕明年辛丑改元淳祐其秋以言者論列改提舉建康府崇禧觀此刻題庚子孟秋蓋在提舉任尚未得遷運判之

命黃唐兩君當是同官於粵者惜乎志乘未之載也是歲後村年五十有四

經筵薦士章彙

淳祐元年七月刻

右經筵薦士章彙熙寧中樞密直學士尚書右司郎中兼侍讀陳襄上進所薦者端明殿學士右諫議大夫集賢院修撰提舉兩京嵩山崇福宮司馬光端明殿學士翰林侍讀學士尚書吏部郎中知許州韓維翰林侍讀學士寶文閣學士尚書戶部侍郎提舉西京嵩山崇福宮呂公著祕書監集賢院學士知杭州蘇頌右司諫直集賢院孫覺尚書祠部員外郎祕閣校理知齊州李常尚書兵部員外郎直集賢院知和州范純仁尚書祠部員外郎直史館權知河中府蘇軾尚書祠部員外郎集賢校理權知洪州曾鞏尚書祠部員外郎集賢校理同修起居注孫洙

秘書丞集賢校理史館檢討王存太子中允館閣校勘判武學  
領臨秘書省著作佐郎集賢校理知太常禮院林希太子中允  
館閣校勘簽書應天府判官驪公事劉摯太常博士崇文院校  
書句當宗正丞公事虞太熙太子中允監西京洛河抽稅竹木  
務程顥太子中允權發遣淮南西路轉運判官公事劉敞殿中  
丞新差充秦鳳熙河路措置邊事司句當公事兼催督軍須薛  
昌朝秘書省著作佐郎前崇文院校書張載權興國軍節度掌  
書記見磨勘蘇轍前台州司戶參軍召試館閣孔文仲新差欽  
州軍事推官吳黃前潤州延陵縣令吳恕尙書屯田郎中知開  
封府太康縣事林英尙書都官員外郎監潤州河南轉般倉孫  
奕秘書省著作佐郎監揚州糧料院林旦太常博士新差監衛  
州在城鹽倉鄒何尙書右司郎中分司南京李師中尙書兵部

員外郎傅堯俞太常博士新差河東路提點刑獄公事胡宗愈  
前祕書省著作佐郎王安國太子中允降授大理評事唐炯前  
光州司法參軍監安上門英州安置勒停鄭俠凡三十有三人  
李心傳繫年要錄紹興元年十一月壬子手詔內外侍從各舉  
所知三人限五日以聞舉得其人當受上賞毋以先得罪於朝  
廷及蔡京王黼門人爲嫌先是上得陳襄薦司馬光等三十三  
人奏章大善之故有是詔宋史藝文志所載紹興求賢手詔一  
卷卽此也此碑上層有紹興手詔中二層爲襄薦蔡末一層則  
襄五世從孫塏跋也塏在淳祐元年以直龍圖閣提點浙西刑  
獄因刻石於平江憲治不知何時移置府學子嘗讀牟獻之集  
言古鑒薦草皆親筆塗改勾注其旁蓋此襄真迹歟之猶親見  
之今久不存卽此碑近在吳中亦無過而問者甚矣好古之難

得也

李良等題名 淳祐丁未

右李良等題名在杭州之天竺山其文云淳祐丁未立秋二日  
天台李良夏紹基武夷翁孟寅金華何子舉嘉禾葉隆禮宛陵  
吳來遊喜雨凡十行隆禮卽撰契升國志者而宋史不見其  
名爵里遂無攷讀此刻知爲嘉興人檢嘉興志隆禮淳祐七年  
進士則丁未正隆禮登第之歲也是歲六月癸巳賜進士張淵  
微等五百二十七人及第出身淵微等以同南宮免瓊林賜宴  
故此題有喜雨之語李良諸人殆皆新進士與隆禮爲同年生  
歟

蔡杭題名 淳祐辛亥仲春

右蔡杭題名十一行文云蔡杭自江左移憲浙東便道過家泛



舟九曲積雨新霽山川呈秀哦咏而歸同游者謝元龍藍簡子  
蔡勳吳戴詹復子公亮侍時淳祐辛亥仲春誌按宋史列傳有  
南蔡抗此則西山先生之孫官參政謚文肅者也予細審此刻  
抗字从木旁與東都蔡抗从手旁者不同攷癸辛雜識兩載杭  
事一从木旁一作杭卽杭之譌與石刻正合又其兄模名亦從  
木旁則宋史作抗者爲誤本傳云官江東提點刑獄加直祕閣  
特授尚書司封員外郎進直寶章閣尋加寶謨閣移浙東此刻  
亦云自江左移憲浙東似相符合但南宋時諸曹郎皆爲職事  
官外任未有兼帶者抗何以特授司封之職殊不可曉仲節家  
於建陽非自江赴浙經山之路而云便道者宋制外任差除有  
云填見闕者例當疾速之任有云替某人成資闕者前任資歷  
未滿交代之期尚遠不妨便道過家也浙東提刑司置于紹興

府改會稽續志抗以江東提刑除浙東提刑淳祐十一年五月到任卽辛亥歲也仲春過家仲夏到任先後正合

四明程振父等題名

淳祐辛亥春分

右四明程振父等題名在虎邱試劍石之右其文云淳祐辛亥春分四明程振父天台趙必堯方甫眉山蘇因同以東餉檄委在吳直暇載酒來游此山甫弟來侍予弱冠時卽摩挲此石未審東餉之語頃乃知東餉卽淮東總領司總領專司屯駐御前軍錢糧故有餉名淮東淮西各置總司故稱東餉但不識其時淮東總領爲何人耳

帶御器械張塤壙刻

右帶御器械張塤壙刻塤字伯和世居會稽之蕭山其妻長興縣主爲榮文恭王之妹卽理宗姑也初授承信郎紹定六年從

銓曹注寧國府監稅端平六年召除閤門看班祇候轉承節郎  
嘉熙三年二月丐外特添差揚州兵馬鈐轄仍釐務帶行閤門  
祇候淳祐元年九月差兩浙東路兵馬鈐轄衢州駐劄帶閤職  
如故二年轉保義郎六年四月差兩浙西路馬步軍副總管臨  
安府駐劄待次十一月詔入爲帶御器械兼幹辦皇城司七年  
十二月轉成忠八年二月轉忠翊十二月御帶因任十年十月  
轉忠訓十一年十二月以皇城親從陞諸班直汾賞起轉修武  
十二年八月屬疾乞掛衣冠上不允轉訓武主管佑神觀疏再  
上轉武翼郎致仕終于癸卯得年六十有九以癸丑歲十一月甲  
申合葬於邑之夏孝鄉越王山之原碑末題孤哀子萊孫稱孫  
識從事郎資善堂檢閱劉仰和填諱南宋墓誌存于今者罕矣  
此刻獨完好悲其爲穆陵至戚而名不登于史冊又可藉以攷

見武臣遷轉之法故具錄之

太學土地封勅告

寶祐四年九月

右太學土地封勅告二通一淳祐六年五月封正顯昭德文忠侯其云右丞相倡者游似也知樞密院事兼參知政事葵者趙葵也同簽書樞密院事兼樞密院事參知政事韓者陳韓也一寶祐四年八月封正顯昭德文忠英濟侯其云右丞相元鳳者程元鳳也參知政事似道者賈似道也參知政事抗者蔡抗也前載勅詞次列宰執及給事中中書舍人銜次書某月某日某時都事某受左司某付吏部次再列宰執及吏部尚書侍郎銜不著姓名次大書告某封號奉勅如右符到奉行鈐以尚書吏部之印次列主事令史書令史姓名次書某年某月某日下蓋當時文書之式如此宋自元豐以後臣僚除官勅出於尚書省付舍人

院撰詞經門下錄黃付吏部乃書告行下觀此刻知諸神加封亦然矣南渡太學土地相傳以爲岳忠武飛蓋紹興時以忠武故宅改建

賜忠顯廟牒 景定元年八月

右勅賜忠顯廟牒牒尾著少師右丞相衛國公者賈似道也知樞密院事兼參知政事朱耆朱熠也發書樞密院事兼樞密院事兼參知政事皮者皮龍榮也咸淳臨安志稱紹興十二年詔禮部討論太學養士法仍令臨安府權於府學措置增廣十三年六月臨安守臣王喚即岳飛宅建學成詔禮部侍郎直學士院王嘗爲記此碑引國史紹興三十二年以岳飛宅爲太學與臨安志紀年互異未審誰得其實志又云太學后土神廟在學之東南隅端平二年爵通侯賜廟額淳祐六年再加封贊書有云相傳中

興名將英靈未泯於世甚著蓋其故居自是遂明指神爲岳忠  
武王景定二年從監學之請超封王爵卽其舊謚易武爲文仍  
改廟額曰忠顯神之父母妻子下逮將佐皆有命秩今以此碑  
攷之知當時封神父和顯慶侯母姚氏元闕兩字夫人妻李氏德正  
夫人子雲繼忠侯雷紹忠侯霖續忠侯震緝忠侯霆續忠侯子  
婦五人相德介德助德翊德贊德夫人將佐張憲烈文侯徐慶  
昌文侯黃先煥文侯牛早顯文侯李寶崇文侯王貴尚文侯而  
神號由八字侯超封二字王也

閤門寄班祇候洪公墓碣

右閤門寄班祇候洪公墓碣在嘉定縣西北鄉朱魏土地廟文  
已磨滅不可識唯額題宋故閤門寄班祇候洪公之墓十二字  
正書尙完好攷宋史職官志東西上閤門篇有祇候十有二人

又增置看班祇候六人無所謂寄班者而入內內侍省篇有云  
嘉定初詔內侍省陳乞恩例親屬充寄班祇候以十年爲限似  
南渡後乃有寄班之名後讀續通鑑長編天禧四年四月丁酉  
詔寄班祇候自今準三班使臣所定年限考課又檢宋史石普  
傳十歲給事即中以謹信見親補寄班祇候劉文質傳以左班  
殿直遷西頭供奉官寄班祇候張昭遠傳擢左班殿直寄班祇  
候乃知真仁兩朝已有寄班祇候職官志漏而不書耳

### 建康府縣

右建康府縣嘉慶庚申羅生鏡濤於鄉試號舍壁間得之古甌  
文多隱起此獨深刻書法道美頗似思陵御筆非尋常博埴工  
所及也此甌不題年月又無匠役姓名攷景定建康志建炎三  
年四月上如建康詔改江寧爲建康府則爲南宋刻無疑

潛研堂金石文跋尾續第六

嘉定錢大昕

金

都統經畧郎君行記

天會十二年仲冬月

右都統經畧郎君行記前爲女直字而後以漢字釋之文稱皇弟都統經畧郎君而不署名金石家或以宗輔當之然宗輔乃太祖之子太宗之姪碑刻於太宗時不當稱皇弟也或以撻懶當之攷金史紀傳其時撻懶又不在陝西予謂此郎君蓋撒离喝也撒离喝本金之宗室又爲世祖養子則與太宗爲昆弟行宜有皇弟之稱李心傳建炎以來繫年要錄云紹興元年即金天會九年十月宗弼爲吳玠所敗自河東還燕山左副元帥宗維即粘罕也宗翰與喝同畧在軍中更以副統撒离喝爲陝西經畧使此云都統經畧正與繫年錄合蓋由副統遷都統也繫年錄又



云婁宿引兵來犯吳玠擊敗之撒离曷懼而泣金人因目爲啼  
哭郎君是撒离曷本有郎君之稱矣金史本傳不載除都統經  
畧使殊爲闕漏當依繫年錄及石刻補之撒离曷今譌改爲薩  
里干云

靈峯院千佛洞碑

皇統三年七月

右靈峯院千佛洞碑洞在八溝北三百八十里其山曰遮蓋入  
山十里許有洞土人名爲大礮子洞高丈有二尺廣丈有八尺  
中刻如來像旁侍阿難迦葉二尊背循洞入少折而西路漸窄  
高廣不盈丈又折而東亦如之洞內兩旁石厓俱鑿成佛像碑  
立於洞門外其文云遼乾統三年西山院天台法師鑿山穿石  
前以成殿後以環洞名曰靈峯院後遭兵火寺如懸磬皇統辛  
酉歲僧惠學等請中京資聖院遵悅嗣興之遠近居民各發一

念願心匠成千佛石像蓋石像通天台法師所開洞中千佛則金皇統中僧遵悅成之也遼金以中京爲都會其俗又好佞佛故石像在在有之此碑長興縣鄉貢進士杜彥臣所作文云茲縣之東南有山曰遮蓋知其地於金時屬長興也元中統二年省長興入大定縣

宜州廳峪道院復建藏經千人邑碑

皇統八年七月

右宜州廳峪道院復建藏經千人邑碑宜州卽今錦州府之義州也金史地理志義州崇義軍遼宜州天德三年改州名碑立於皇統八年皇統在天德之前故尙沿遼舊名也道院久廢唯石佛大小數軀尙存其地名臺頭溝在三座塔東北百九十里蓋昔爲義州西境今改屬直隸承德府之朝陽縣也碑云廳峪者耶律詳穩之墳所詳穩遼之官稱不著其名今其墳亦莫知

所在矣

臨潼縣九陽鐘銘 大定二十一年四月

右臨潼縣九陽鐘銘縣令柴震所作淺陋無足觀周遭刻官吏及助緣人姓名殆徧其最貴者曰宣差朝散大夫尙書戶部郎中規措銅冶鑄錢所張曰宣差中大夫尙書吏部員外郎規措銅冶鑄錢所麻曰龍虎衛上將軍陝西路統軍使兼京兆尹本路兵馬都總管夾谷清臣曰陝西路統軍都監曰定遠大將軍同知府尹兵馬都總管李曰曰昭發大將軍府少尹兵馬副都總管段成功曰昭毅大將軍統軍判官耶律一里哥其餘不能悉數矣攻金史食貨志大定十二年正月以銅少命尙書省遣使詣路規措銅貨能指坑冶得實者賞十八年代州立監鑄錢命震武軍節度使李天吉知保德軍事高季孫往監之而所鑄

瑛駁黑澁不可用詔削天吉季孫官落職更命工部郎中張大節吏部員外郎麻珪監鑄卽此鍾所列張麻二人也史稱大節工部郎中此刻云吏部者蓋由工部轉吏部耳

馬丹陽滿庭芳及歸山操

大定戊申孟冬

右馬丹陽滿庭芳詞及歸山操詞前題唐括夫人索滿庭芳下云鈺稽首上蓋丹陽自書以遺靈源者歸山操則丘長春所書公主得其本亦以寄靈源兩篇各爲一碑皆有東平吳似之跋年月結銜相同後題皇女宿國公主昭勇大將軍尙衣局使兼近侍局使上輕車都尉彭城郡開國伯食邑七百戶駙馬都尉唐括元義立石亦兩碑相同前跋云靈源姑唐括氏巾國太夫人之女大丞相文正公之妹後跋云駙馬唐括昭勇相國文正公之的嗣靈源姑之兄子按金史唐括安禮傳本名幹魯古大

定初遷益都尹二十一年拜右丞相進封申國公是歲薨碑所謂大丞相者蓋卽安禮而傳不云諡文正又不載其子尙公主則史之漏也輟耕錄上處機号長春子登州棲霞縣濱都里人金皇統戊辰正月十九日生大定丙戌年十九辭親居崑崙山俠道者修真丁亥謁重陽王真君于寧海請爲弟子戊申召見闕下隨還終南山碑立于大定戊申時長春年四十一正當召見闕下之時故公主亦重其書耳碑在濰縣玉清宮錢塘朱朗齋摹其文寄示因爲攷正如有

完顏育孔廟祭文

承安四年三月

右完顏育孔廟祭文孔元措跋云相國完顏公自尙書右丞出鎮沅郡攷金史宣宗紹承安二年八月丙戌左宣徽使膏爲尙書右丞三年十二月丙戌尙書右丞膏罷凡史不書姓者皆完

顏氏則音與膏卽一人矣金史始祖以下諸子傳膏本名阿里  
刺以皇家近親收充東宮護衛承安二年拜尙書右丞出爲泰  
定軍節度使音與膏字形相似傳稱皇家近親其世系則不可  
攷矣膏音皆不見於字書蓋轉寫之譌當從石刻爲正說文音  
用也从音从自讀若庸此作音者隸體小變耳唐末兖州節度  
賜号秦寧軍五代宋皆因之此云秦定者大定十九年改名也  
史家紀日之例自一日二日以至十日未有加初字者此文云  
三月癸巳朔初二日甲午蓋流俗之稱然顧寧人記泰山白龍  
池宋人題名有元祐丁卯孟春初四日奉符令林曾題崇寧壬  
午孟春初七日奉符令李珪題又在此刻之前矣宇文懋昭大  
金國志其紀日自初二以至初十皆有初字可證金源史家相  
沿皆如此也

利州精嚴寺蓋公和尚行狀銘

永安五年

右利州精嚴寺蓋公和尚行狀銘今在直隸塔子溝通判治東北七十里俗名大城子卽遼金元之利州也興中故城土人稱爲三座塔此城外亦有石塔大小三所因名小三座塔而利州之名遂隱乎以此碑及至元廿四年長壽山玉京觀碑證之知爲利州故城蓋金石文字往往有功於地理而塞外荒僻文獻无徵可與言者唯石丈人恨土人不知珍惜耳碑爲北京路轉運吏度判官趙秉文撰并書開闢詞翰金源人最所推重而埋没于風沙瓦礫之場尤可歎也蓋公本名圖蓋利州阜俗人從北京徵公付法大定六年開堂于精嚴寺繼主松林靈感時人稱爲蓋堂頭

貞祐寶篆文

右貞祐寶券文四周有闕上橫書貞祐寶券四字下一格直書五貫八十足陌六字左旁文云字号右旁文云字料次下一格直書凡九行前列省准印造諸路通行寶券云云次書偽造者斬賞寶券三百貫仍給犯人家產次列貞祐年月日次列尙書戶部勾當官印造庫使副判官寶券庫使副判官等押闕外上方又橫書五貫二字左闕外又有兩合同記斜出其右角侵入闕界文頗曼患予堦羅生中溶辨其文一云平涼府合同一云京兆府合同按金史食貨志金海陵遷都置交鈔與錢並用宣宗貞祐二年五月權西安軍節度使烏林達與言關陝軍多供億不足所仰交鈔則取於京師徒成煩費乞降板就造便七月改交鈔名曰貞祐寶券又百官志貞祐二年設交鈔庫於上京西京北京東平大名益都咸平眞定河間平陽太原京兆平涼



廣寧等府瑞蔚平清通順薊等州三年罷之此券有不限年月  
許於京兆平涼府庫例換語知爲京兆平涼所刻板也

元

令旨重修艸堂寺碑

丁未年十月

右令旨重修艸堂寺碑碑分四段上兩段稱闕端太子令旨一  
題癸卯年五月一題乙未年十一月下一段稱皇太子令旨題  
丁未年四月最下一段稱鐵哥火魯赤都元帥鈞旨題丁未年  
十月今在鄧縣艸堂寺乙未者元太宗之七年癸卯者太宗之  
十五年此碑癸卯令旨轉刻於乙未令旨之上蓋摹勒上石時  
失其次耳丁未者定宗之二年碑云谷與皇帝史稱定宗名貴  
由與谷與聲相近太宗紀以中原諸州民戶分賜諸王其云古  
與者亦謂定宗谷古聲亦相近也元史耶律禿花傳拜太傅總

領也可那延統萬戶札刺兒劉黑馬史天澤伐金卒於西河州  
子朱哥嗣仍統劉黑馬等七萬戶碑兩稱猪哥胡秀才一稱朱  
哥那衍一稱也可那衍皆謂耶律朱哥也朱哥既襲父職故亦  
有也可那衍之稱胡秀才當是朱哥賜号非別有一人也劉黑  
馬傳太宗始立三萬戶以黑馬爲首辛丑改授都總管萬戶統  
西京河東陝西諸軍萬戶夾谷忙古歹田雄等竝聽節制碑或  
稱劉黑馬或稱劉萬戶實一人也田雄傳癸巳授鎮撫陝西總  
管京兆等路事碑或稱田拔覲兒或稱田八都魯皆謂田雄也  
史不云賜名入都魯此可以補史之闕碑有鐵哥丞相又有怙  
哥都元帥兩人同時同名然皆非元史列傳之鐵哥元人同名  
者甚多當依年代斷之不可牽混爲一也上二道鈐以東宮皇  
太子寶最下一道鈐副元帥印鐵哥署銜都元帥而印文稱副

元帥蓋由副元帥進擢尚未換印耳第一第四段印文有長  
吾字似是批押之類碑云窩魯朶卽斡耳朶答刺花赤卽達魯  
花赤以至諸哥之卽朱哥鐵哥之卽帖哥拔覲兒之卽八都魯  
卽一碑中亦前後互異蓋譯音初無定字當時文移徃復亦不  
能書一也鐵哥丞相不見於史且在闊端太子位下則是遣授  
非真相矣

雲峯真人康泰眞碑 丙辰年

右雲峯真人康泰眞碑在塔子溝東北六十里長壽山泰眞利  
州花務村人元初特賜名眞體道至德眞人自号雲峯子葬此  
山中撰碑者白霜進士李姓其言不可辨碑末題丙辰年癸巳  
月丁酉日建蓋元憲宗之六年也碑末有宣差利州達魯花赤  
口正允名大寧本奚王地奚嘗同族故郡人多稱白霜

濟南孟公神道碑

至元二年三月

右濟南孟公神道碑在齊東縣東南二十里碑首題宣授濟南路行軍萬戶孟公而篆額但云濟南孟公縣簡不同唐人石刻多如此孟德元史有傳而不書其卒之年碑云以中統四年三月五十八日薨于軍春秋六十八可補史家之闕傳載丁巳從伯顏攻襄樊丁巳者憲宗七年也其時伯顏尙未仕于朝攻襄樊乃世祖至元間事大將爲阿朮非伯顏予於攷異漢斥其誤今據此碑則攻襄樊之時德死已久矣傳載宋安撫呂文德以兵援邊德敗之俘其太尉劉海碑云公至海州城堞未完賊軍大至公于城中募得思敢必死之士申以再三號令之嚴一鼓而進大潰斬彼渠魁之首懸諸壘柵之間似與傳相應宋史無文德傳其事無可攷矣碑立于至元二年姑洗月誤文者前進

士長白張翔男元方書丹并篆額者長白逸人孫瑜元方未有名位而系其父名它碑所罕見也傳云甲辰定宗母六皇后稱制大王按只台以德爲萬戶攻濠蘄黃等州積有戰功憲宗卽位之三年命德守睢州五年移守海州据碑則守睢州在前宣授萬戶在後又海州立功之後嘗移鎮邳州而傳失書皆當以碑爲正元史列傳多差謬安得徧求石刻而改正之

御香投龍簡感應碑

至元七年三月

右御香投龍簡感應碑在濟源縣濟瀆廟碑稱宣授統轄諸路眞大道教大宗師通元眞人孫又稱孫通元而不書其名以元史釋老傳證之蓋鄙希誠之徒孫德福也碑末列名有云懷孟路同知總管府事中都雙樓子大哥阿合馬者此別是一人非姦臣傳之阿合馬而所謂雙樓子大哥竟不知何語

大輪禪師碑 至元二十四年九月

有大輪禪師碑在承德府東南四十里其額云興州宜興縣五指山大靈峯禪師大輪禪師碑銘大都大奉福禪寺傳法住持同祖沙門居實撰文稱大輪爲鳩巢法師弟子至元七年以中書右丞相疏請住持大靈峯寺開堂于都之永泰十二年示疾而化收舍利本山祖塋塔葬之此碑予分修熱河志時所得書法不甚工然因是知古北口外地於金元屬宜興縣紀方輿者得之如獲指南鍼矣

平江府報恩萬歲賢首敎寺碑 至元二十九年八月

右平江府報恩萬歲賢首敎寺碑今在蘇州本寺土人稱北寺者是也碑爲高唐閭子靜撰書東平徐子方篆額二公皆嘗廉訪浙西各負重名此刻亦完好無恙而府志畧不及之何歟

平江路儒學祭器碑 元貞元年十月

右平江路儒學祭器碑在蘇州府學儀門壁間盱江李淦撰嚴陵方文豹書兩人皆儒學教授李以至元廿九年十二月到任明年以祭器非度攷朱文公釋奠釋菜禮文祢爲之其年十一月方亦到同任斯事元貞元年十月始成首尾凡三年今文廟庫所存至元癸巳象尊及銅豆俱刻李姓名元貞元年銅爵銅簠銅豆俱刻兩人姓名與碑合淦以揚州路學正上書請斬葉李驛召詣京師授江陰路教授以旌直言見元史葉李傳當在至元廿九年據此碑淦爲平江路教授非江陰也淦字性學

長興東嶽行宮碑陰

右長興東嶽行宮碑陰上層額云重修建東嶽行宮施主題名下層額云東嶽行宮常住田土皆篆書橫列字迹頗不惡而以

出爲土則昧于六書之旨矣予向讀南邨輟耕錄載連枝秀珠  
簾秀順時秀天生秀等疑爲妓女之稱今讀此刻施捨戶有程  
二秀因千十二秀張千十一秀周季一秀趙口二秀始知元時  
女子皆以秀爲稱若宋人稱第幾娘也因氏見于左氏傳自後  
此姓絕少此刻因姓凡數人

崑山州重建海寧禪寺記

延祐二年四月

右崑山州重建海寧禪寺記趙子昂文并書寺在今太倉州城  
內於元爲崑山州地元史仁宗紀皇慶二年十月徙崑山州治  
于太倉此碑云延祐改元徙州治史書下詔之日碑載移治之  
始似異而實同也此碑不知何年重刻頗多謬字碑末題年号  
爲元祐尤其甚謬者子昂結銜當云集賢直學士碑作集賢閣  
學士亦誤元時無此閣名



贈清河郡伯張成墓碑

延祐二年三月

右贈清河郡伯張成墓碑趙松雪書東昌社山石匠作頭周世英等刊刊手不精故少生動之趣碑云世爲濟寧之虞城人按虞城縣唐屬宋州宋改州爲應天府金又改歸德府而縣之屬如故元初併省入單父縣其後復立遂隸濟州白明以來仍屬歸德不知其嘗隸濟寧矣元之濟寧治鉅野與虞城本不相遠

廣州路銅漏壺題字

延祐三年十二月

右廣州路銅漏壺題字予視學廣東所揭戊午歲八月檢故筭得之距初拓時已隔二紀目眊不能見細字瞿瞿鏡潯爲審其文蓋列名者二十人曰作頭洗蓮行曰作頭杜子盛曰南海縣該吏陳程曰廣東道宣慰使司都元帥府曰陽提領口口曰承務郎廣州路南海縣尹曰勸農事周勝口口廣州路總管府提

控案廣兼照磨口口架閣常口口廣州路總管府知事宋居敬  
曰承直郎廣州路總管府推官王口口承德郎廣州路總管府  
推官王思聰曰廣州路總管府判官扎忽曰廣東道宣慰使司  
都元帥府令史常文廣曰口口郎廣東道宣慰使司都元帥府  
都事王巨威曰承口口郎廣東道宣慰使司都元帥府都事楊復曰  
承直郎廣東道宣慰使司都元帥府經歷穆齊英曰承直郎廣  
東道宣慰使司都元帥府經歷捏古伯曰中順大夫廣東道宣  
慰副使僉都元帥府事王從口口奉口口大夫廣東道宣慰副使  
僉都元帥府事拜降曰口口大夫廣東道宣慰使司副都元帥  
阿剌不丁曰口口大夫廣東道宣慰使都元帥口忽里曰口口  
大夫廣東道宣慰使都元帥烏馬丁其序以左爲上與宋金勅  
牒符帖之式同明以來文牒始以在後者爲卑矣

伯家奴造聖相記

至治二年

右伯家奴造聖相記在杭州府城內吳山寶成寺翟孝廉均廉所貽文云朝廷差來官驛騎衛上將軍左衛親軍都指揮使伯家奴發心喜捨淨財莊嚴麻易葛刺聖相一堂祈福保祐宅門光顯祿位增高一切時中吉祥如意者按元置左右衛親軍都指揮使司本在京師伯家奴奉使在杭故有朝廷差來官之稱亦不知何公事也麻易葛刺番僧所奉之神輟耕錄今上初入戒壇見馬哈刺佛前供羊心卽此佛也柳貫護國寺碑云摩訶葛刺神漢言大黑神也亦卽此譯音無定字

周天大醮投龍簡記

泰定元年正月

右周天大醮投龍簡記首云泰定改元甲子之春正月詔元敎大宗師元德真人吳全節太一崇元體素演道真人嗣敎七祖

蔡天祐五福太一真人呂志葵正一大道真人劉尚平元教嗣  
師真人夏文泳率法師道士幾千人修建金籙周天大醮于大  
都崇眞萬壽宮爲位二千四百晝夜凡七受釐之日天顏甚愉  
重封香幣進大一七祖真人蔡天祐承德邸郊祀署令馬懷吉  
捧刻玉寶符元壁龍紐馳詣濟瀆清源投奠按元史釋老傳吳  
全節至治二年制授特進上卿元教大宗師崇文宏道元德眞  
人此碑立于泰定初在至治之後僅稱元教大宗師元德眞人  
未有特進上卿及崇文宏道之號然則此號後來增加史誤併  
爲一事耳夏文泳全節之徒亦見釋老傳蔡天祐稱太一嗣教  
七相當是李居壽之徒而史不載

重建文殊寺碑

奉定三年八月

右重建文殊寺碑其文鄙俚無足觀而叙述宗王世系可資史

家攷證其云眞吉思皇帝卽位之年降生又合歹卽史所稱察  
合台也其下曰拜口里大王曰阿口口大王曰口口大王曰喃  
忽里大王曰喃失里太子皆嗣又合歹位者以宗室世系攷  
之察合台曾孫有南荅失里王名似相近而其父不名喃忽里  
諸王表有幽王喃忽里則又睿宗子旭烈兀之後非察合台之  
裔與史全不合且碑立於泰定中喃忽里已先卒亦無幽王之  
稱而順帝紀至元二年以甘肅行省白城子地賜喃忽里則順  
帝時尙存必非一人矣此碑海寧州松靄同年所贈云在肅州

天妃廟迎送神曲

泰定四年 月

右天妃廟迎送神曲并序在蘇州府城內天后宮句章黃向撰  
文清陽讀浚齊丹天妃者興化軍莆田縣湄洲林氏女宋熙寧  
以來久著靈異元時江浙置海道都漕運萬戶府海舶往返事

神尤謹元史祭祀志云天妃神號積至十字碑云護國庇民廣  
濟明著天妃祇有八字較元志少福惠兩字以諸帝紀攷之至  
元二十五年六月詔加封南海明著天妃爲廣祐明著天妃大  
德三年二月加封護國庇民明著天妃天歷二年十月加封護  
國庇民廣濟福惠明著天妃至正十四年十月加號輔國護聖  
庇民廣濟福惠明著天妃蓋自至元以後封號由二字積至十  
二字志所載封號十字特天歷所封之號未可以槩一代而美  
號遞加不過兩字則大德加封六字之後天歷加封十字之前  
必有加封八字一節本紀漏落頓有此碑可以校補而加封在  
何年月則不可攷矣碑有參知政事張毅張友諒二人史表不  
見其姓名或江浙行省之參政邪碑又云舊章氏家廟攷宋時  
建安人寄居於吳者有南北二章子厚爲南章質夫爲北章此

碑在城北必質夫家廟也

龍興路儒學銅鼎題字 至順四年

右龍興路儒學銅鼎題字王鶴筭搦以遺予并致書言元文宗崩於至順三年八月則至順不得有四年以是可疑予攷文宗殂於上都在至順三年八月其十月立兒子郯王是爲寧宗甫踰月而殂未及改元其明年春迎順帝至都久未得立及燕帖木兒死乃以六月卽位十月戊辰詔改至順四年爲元統元年是元統改元以前猶稱至順四年今蘇州府學有千文傳撰修學記後題至順四年九月是其證也

江東建康道廉訪司題名記

右江東建康道廉訪司題名記王士熙撰文卜顏帖睦兒書不著立碑年月以題名證之當在元統間又有至元至正續題者

則字畫不甚整齊矣元時置江南諸道行御史臺於建康領廉訪司十道江東建康其一也廉訪司正官有使有副使有僉事題名各爲二列乾隆甲寅六月宣城張惺齋拓一本遺予云碑現在寧國府署前蓋此司雖以建康繫銜而治所實在寧國路也

中順大夫竹溫台碑

後至元元年

右中順大夫竹溫台碑翰林待制奉議大夫兼國史院編修官揭傒斯撰文奎章閣大學士賁善大夫知經筵事懷巖書丹奎章閣侍書學士中奉大夫同知經筵事尙師簡篆額竹溫台者蒙古人爲魯國大長公主媵臣冒姓張吉刺氏事魯王爲管領隨路打捕鷹坊諸色人匠等戶錢糧都總管府副達魯花赤遷達魯花赤卒葬歡喜嶺之麓有子曰撒而吉思鑑事文宗爲官



相總管府副總管入宿衛順帝尤愛之詔爲其父立碑碑在烏丹城南七里地名烏蘭板上文字尙可讀聞烏丹城中有廢塔塔前斷碑亦有魯國大長公主字則此地元爲魯藩農土所謂烏丹城者豈卽本藩駐冬之全寧城乎

重新粧鑿聖像記 後至元六年十月

右重新粧鑿聖像記在蘇州雙塔寺予昔游所未見頃瞿堦鏡濤搨得之其文釋普琳撰記東禪僧澤庵爲壽寧寺大殿裝佛事其時住持壽寧者則佛心普智雄辨大師行誥也行書頗似趙承旨而不見書人姓名唯有大中大夫平江路總管府達魯花赤兼管內勸農事也兒吉你普篆額名攷府志元達魯花赤有也里吉里卜蓋卽其人譯音無定字也粧鑿蓋當時土俗之語額改題壽寧萬歲教寺裝佛之記斯爲得之不嫌兩題互異

也

濟陽縣曲堤鎮大成廟碑 至正三年七月

右濟陽縣曲堤鎮大成廟碑正奉大夫山東東西道肅政廉訪使王士熙謨翰林學士承旨榮祿大夫知制誥兼修國史知經筵事張起巖篆中順大夫西蜀四川道肅政廉訪使楊僖書元時廉訪使秩正三品正奉大夫從二品中順大夫正四品士熙僖同爲廉使而階各不同由於資歷有深淺也碑刻篆額人例在書者之後此碑起巖在僖前當以起巖先達不欲多上之耳僖分隸秀勁不減唐人而世鮮知者當表而出之凡屯戍之所稱鎮史家志地理多不載獨金志具書之濟陽縣有鎮四曲堤實居其一今刊本或作提蓋失之矣元時諸鎮往往有建學立先聖廟者以予所見石刻如河內之清化鎮掖縣之西由場并

此而三矣

中書平章政事高公勲德碑 至正七年

石中書平章政事河隴高公勲德碑于文傳撰碑不書其名以史攷之蓋納麟也其叙歷官與史頗合此碑因卧佛寺僧廣宣之請而作故於行宣政使事言之特詳然失立言之體矣碑稱其大父智耀爲忠簡公而史云諡文忠當以碑爲正或初諡忠簡而後改文忠乎其曾大父爲西夏駙馬亦史所未及

瑞州雲谿洞碑 至正七年五月

右瑞州雲谿洞碑題云大寧路瑞州海濱鄉周家莊雲谿觀碑海濱本遼舊縣置隰州治此仍隸來州節度金皇統三年廢隰州以縣隸來州其後改來州爲宗州又改瑞州而所隸縣如故元廢海濱縣入州故碑有瑞州海濱鄉之稱今在塔子溝東南

三百七十里瑞雲山

長興州重修學官記 至正十一年二月

右長興州重修學官記賜進士出身丞事郎前台州路天台縣尹兼勸農事會稽楊維禎授賜同進士出身將仕郎前處州路錄事丞嘉高明書賜進士及第承務郎內臺監察御史大名張士堅篆額維禎字廉夫泰定丁卯二甲進士明字則誠至正乙酉三甲進士士堅與則誠同榜卽是榜狀元也廉夫以詩文重東南學者稱鐵崖先生則誠長於詞曲琵琶傳奇至今膾炙人口士堅事迹無可攷據此碑知其曾任中臺御史篆書亦有法度記爲州長火魯忽達修廟而作記中又稱魯侯者從邦俗之稱或舉首一字或舉中一字無一定之式也侯字得之世家北庭平章政事保八之適子嘗游成均兩膺鄉薦碑立於至正十

一年魯侯在長興已六年矣

濟南郡宣懿公張宓碑 至正十四年三月

右濟南郡宣懿公張宓碑翰林國史院編修官李國鳳撰文翰林學士承旨張起巖篆額皆列名於前而書丹者爲宓之從子景德則退居碑末此亦金石之一例也宓字淵仲山東行尙書省兼兵馬都元師濟南公榮之孫淮安路總管邦憲之子幼以質子侍武宗潛邸賜名蒙古歹仁宗卽位詔授以二品官辭選滕州知州入爲度支監丞出知南陽府未行政兵馬司都指揮使預討帖失赤斤鐵木兒逆黨遷彰德路總管擢山北廉訪副使改保定路總管天厯初紫荊閩潰軍入保定界剽掠居民相率持挺斃其尤無良者時知樞密院也先尼史作也先駐軍城外召府同知縣尉與居民百餘人至軍責以擅殺盡戮之復下令

屠城宓時以病在告卽昇疾至帳下也先尼怒詬之曰汝欲反乎宓從容曰孰敢反耶夫軍士不戰而潰逞虐良民法所不赦小民不辨誰何倉卒格之至死樞密已殺百餘人償其死又欲屠城城中戶不下萬餘萬一激變咎將誰任我寧以身代民死耳也先尼默然猶殺張珪五子解圍去命宓諭民以不殺故皆額手相慶調真定移平江請罷平江財賦司之隸徽政院者詔罷平江杭州集慶提舉司衆賴少蘇召爲吏部尙書拜嶺北行省參知政事以病歸復起爲山東東西道宣慰使尋致仕歸濟南至正四年卒贈江浙行省參知政事追封濟南郡公諡宣懿攷明初修元史告成以闕順帝三十六年事遣國子典膳呂復乘驛往北平及山東開局采訪頗及碑碣北平得四百通山東二百通印識上進此碑近在濟南宓名位亦不卑且於保定有

全城之功宜附見於榮傳而史無隻字及之豈采訪有罣漏歟抑會上史局而史官漫不省歟益都李南澗好按羅三齊掌故手搨是碑見寄喜其有裨史學爰撫其大畧以諗後之讀史者榮贈太師追封濟南王諡忠襄又有張霸都兒之稱邦憲贈河南行省參知政事追封濟南郡公諡貞毅皆史所應書而失書者也蘇州府志職官表有張忙古至正三年以正議大夫任總管後改河南省參政者蓋卽此人唯至正當是至順之誤忙古卽蒙古譯音無定字也

太尉丞相祀濟瀆神應記

至正丁酉十月

右太尉丞相祀濟瀆神應記湖廣等處行中書省分省照磨趙恒撰記丞相太不花駐兵洛汭遣譯史汪家奴祀濟瀆靈應之事首云至正丙申冬皇帝念南服未靖思用貴戚大臣申命太

尉丞相太不花乘齊斧以廓清之按元史本傳但云復拜湖廣行省左丞相不言移鎮河南而順帝紀云是歲河南行省左丞相太不花駐軍于南陽碑但稱丞相不署何省當闕以俟攷太不花食吉刺氏世爲外戚故有貴戚大臣之稱是時三公有太師汪家奴而行省之譯史乃與同名初不以爲嫌然後世讀史者每有似甲爲乙之病矣

上虞縣受水壺銘

至正乙巳五月

右上虞縣受水壺銘至正乙巳五月江浙儒學副提舉楊葵撰并書後有同僉樞密院事張子元樞密院副張啟康方永知樞密院事方國珉諸人名乙巳者至正二十五年其時方國珍據浙東自置江浙行樞密院分治上虞新城因鑄刻漏爲晨昏之節而楊葵爲之銘葵篆書有法度其書姓从手有蓋取漢書楊



雄傳也上虞立行樞密院不見于元史殆明初史臣惡其僭越畧而不言歟

開平縣界石 至正二十六年正月

右開平縣界石在直隸豐寧縣西北百三十里高四尺廣尺有二寸正面刻北開平縣界五字側面刻東宜興州界五字其地名上黃旗蓋元時開平縣之南界也元史地理志興州有興安宜興二縣別無宜興州之名唯文宗紀載致和元年八月陞宜興縣爲州以此碣證之正合乃知元志之疏漏多矣明代口外不立州縣故于前朝沿革稽攷尤難乾隆初始設四旗通判駐土城子今改爲縣屬承德府

大通法寺常住上下院地產碑

右大通法寺常住上下院地產碑今在興中故城三座塔旁次

多剝落不見立碑年月而額題大元國懿州路興中州數字獨完好攷元史地理志遼陽路懿州元初嘗爲懿州路至元六年爲東京支郡自後未見升路事而興中州向屬大寧路亦無改隸懿州之文積疑久之後讀順帝紀載至正二年以大寧路所轄興中義州屬懿州乃知志於順帝事多缺而不書而碑之立必在至正間也

安南昭光寺鐘銘

右安南昭光寺鐘銘康熙十三年合浦海濱浮出銅鐘一鑊刻工緻文字完好末題皇越昌符九年乙丑二月好事者移置廉州府學乾隆甲午冬予奉命視學粵東得此拓本安南在宋元時嘗僭號大越末審昌符爲何人紀年頃讀

欽定四庫全書總目載越史畧三卷其書稱今上昌符元年丁

已所云今上者陳煒也自丁巳至乙丑恰九年然則昌符乃陳煒私署之年乙丑歲當明洪武之十八年矣予家所藏金石自三代訖宋元而止此銘不當入錄但以藏弄有年不忍委棄且南交金石匙有流入中國者姑援趙氏錄日本國語之例附之末簡